

## ՌՈՒՄԻ ՍՈՒԼԹԱՆՈՒԹՅԱՆ ՀԱԿԱԹՈՈ ԿԱԹՈՂԻԿՈՍ ԱՆԱՆԻԱՆ

**Բանալի բառեր՝** Կաթողիկոս, Անանիա, Կիրիկիա, հիշատակարան, սուլթան, Կեսարիա, Հռոմկլա:

Պատմական որոշ դեպքերի կամ գործիչների վերաբերյալ հայագիտության մեջ եղած տվյալները և պատկերացումները ժամանակի ընթացքում լրացման, ամբողջացման կարիք ունեն, պայմանավորված նոր սկզբնաղբյուրների ի հայտ գալով և արդեն հայտնիների՝ ավելի մանրամասն ուսումնասիրությամբ: Այդպիսի մի օրինակ է ԺԳ դարի սկզբներին Ռոմի (Իկոնիայի) սուլթանության հակաթոռ կաթողիկոս Անանիային վերաբերող պատմությունը, որի մասին պահպանվել են հայ և ասորի պատմիչների վկայություններ, հիշատակարաններում տեղ գտած տվյալներ և այլ օժանդակ նյութեր:

Հայ պատմագրությունն Անանիային անդրադարձել է Միքայել Ջամչյանից<sup>1</sup> սկսած, որը հիմնականում օգտագործել է Կիրակոս Գանձակեցու հայտնած տեղեկությունները, այնուհետև հակաթոռ կաթողիկոսի գործունեությանն անդրադարձել է Մաղաթիա պատրիարք Օրմանյանը<sup>2</sup>: Գանձակեցու հաղորդումը նկատի ունենալով, նրանք այն եզրակացության են հանգել, որ Անանիան հակաթոռ կաթողիկոս է դարձել 1203 թ.՝ Գրիգոր Զ Ապիրատի (1194-1203) մահից և Հովհաննես Զ Սսեցու (1203-1221) օծումից անմիջապես հետո, իսկ պատճառը եղել է նրա դժգոհությունը, որ ոչ թե ինքն է կաթողիկոս դարձել, այլ Հովհաննես Սսեցին:

Հայագետ Հայկ Բերբերյանը 1964 թ. «Միոն» ամսագրում երկու մասով հրատարակեց «Անանիա հակաթոռ կաթողիկոս 1201, 1211 (1223?)»<sup>3</sup> վերնագրով հանգամանալից հոդվածը, որտեղ ԺԳ դարի սկզբների մի քանի հիշատակարանների տվյալներն օգտագործելով, էական ճշտումներ կատարեց Անանիա-

\* Մեսրոպ Մաշտոցի անվան Մատենադարան, պ.գ.դ., karenmatevosian@gmail.com, հոդվածը ներկայացնելու օրը՝ հոկտեմբերի 22, 2022, գրախոսելու օրը՝ հոկտեմբերի 29, 2022:

<sup>1</sup> Մ. Զամչեան, Պատմություն Հայոց, հ. Գ, Վենետիկ, 1786, էջ 175-177:

<sup>2</sup> Մ. Օրմանեան, Ազգապատում, հ. Ա, Ս. Էջմիածին, 2001, էջ 1828-1829: Տե՛ս նաև Հ. Աճառյան, Հայոց անձնանունների բառարան, հ. Ա, Երևան, 1942, էջ 163-154:

<sup>3</sup> Հ. Պլեպլե-Էան, «Անանիա հակաթոռ կաթողիկոս», Միոն, 1964, էջ 286-289, 360-363:

յի վերաբերյալ, մասնավորապես ցույց տալով, որ նա կաթողիկոս է դարձել ոչ թե 1203 թվականին, այլ ավելի վաղ՝ 1201-ին, ուստի, նրա հակաթոռության պատճառն էլ սոսկ Հովհաննես Սսեցու ընտրությունից դժգոհ լինելը չէր: Ուսումնասիրողն անդրադարձել է նաև այլ հարցերի, որոնց մասին կնշենք ստորև: 1964-ին Հ. Բերբերյանն Անանիային նվիրված հոդվածը՝ կարևոր մի լրացումով, որը վերաբերում էր կաթողիկոսի մահվան թվականին՝ 1227 (քաղված Ստեփանոս Օրբելյանի ժամանակագրությունից), վերահրատարակեց ֆրանսերենով<sup>4</sup>:

Անանիայի մասին ուշագրավ տեղեկություններ է հաղորդում նաև ասորի պատմիչ Անանուն Եդեսացին, որոնք ծանոթ չեն եղել Հ. Բերբերյանին: Եդեսացու ժամանակագրությունը հայերենով հրատարակվել է 1982-ին Լևոն Տեր-Պետրոսյանի աշխատասիրությամբ<sup>5</sup>: Ստորև կփորձենք հնարավորինս ամբողջացնել Անանիա հակաթոռ կաթողիկոսի մասին տվյալները՝ աղբյուրագիտական նյութերն ի մի բերելով և որոշ հարցեր պարզաբանելով՝ սկսելով պատմիչներից:

### Կիրակոս Գանձակեցու և Անանուն Եդեսացու տեղեկությունները

Անանիայի մասին հիմնական աղբյուրներից է Կիրակոս Գանձակեցու Պատմությունը, որտեղ նա հիշատակվում է երկու տեղում: Առաջին անգամ նշվում է Գրիգոր Քարավեժ կաթողիկոսի (1193-1194) մահվան առնչությամբ, որպես կաթողիկոսի հակառակորդներից մեկը. «Եւ ապա Գրիգորիս մի ամ... Եւ էր նա հասական գեղեցիկ և բարւոք տեսանելով, բայց զի մախողք բազում էին նորա, արկին բարուրս ինչ ի վերայ նորա եպիսկոպոսքն նախանձոտք և մատնեցին զնա ստութեամբ Լևոնի թագաւորի: Եւ նա հրամայեաց արգելուլ զնա ի բերդ մի, մինչ քննութիւն լիցի ճշմարտութեամբ վասն նորա, և ինքն գրեաց թուղթ յԱրեւելս՝ յաշխարհն Հայոց առ վարդապետս և եպիսկոպոսս, եթէ զինչ կամք իցեն նոցա վասն այնր: Եւ մինչ չև պատասխան ընկալեալ, վախճանեցաւ կաթողիկոսն այսպիսի մահուամբ. Յաւուր միում տեսին զնա անկեալ ընդ պարիսպ բերդին՝ ունելով կտաւ զմիջաւ իւրով, այնպէս մեռեալ: Եւ զայս ոմանք ասէին, եթէ մախողքն նորա ընկեցին եպիսկոպոսքն, որք ակն ունէին ժառանգել զաթոռն, յորոց մինն ասէին զՅովհաննէս, որ յետ նորա կալաւ զաթոռն, և զԱնանիա, որ եղև հակառակաթոռ ի Սևաստ, յիշխանութեան սուլտանին Հոռոմոց, և

<sup>4</sup> H. Berbérian, « Le patriarcat arménien du sultanat de Roum, l'anticatholicos Anania », REArm., T. 3, 1966, p. 233-241.

<sup>5</sup> Անանուն Եդեսացի, Ժամանակագրություն, թարգմանություն քնագրից, առաջաբան և ծանոթագրություններ Լ. Տեր-Պետրոսյանի (Օտար աղբյուրները Հայաստանի և հայերի մասին, հ. 12, Աստիական աղբյուրներ, հ. Բ), Երևան, 1982:

այլք յեպիսկոպոսաց անտի՝ արք վեց: Եւ կէսք ասէին, եթէ ի գիշերի կամեցաւ փախչել ի բերդէ անտի, հնարեցաւ իջանել ընդ պարիսպն կտաւովն, և կտրեալ կտաւոյն, անկաւ և մեռաւ: Զճշմարիտն մեք ոչ գիտեմք, այս արդարադատին Աստուծոյ է գիտելի...»<sup>6</sup>:

Շարունակելով, պատմիչը գրում է Գրիգոր Ապիրատի աթոռակալության և նրա մահից հետո աթոռին տիրելու շուրջ եպիսկոպոսների պայքարի մասին, որի արդյունքում ընտրվեց Հովհաննես Սսեցին, իսկ Անանիան Ռումի սուլթանին կաշառք տալով հակաթոռ կաթողիկոս դարձավ Սեբաստիայում. «Եւ ապա տէր Գրիգոր Ապիրատն ամս եօթն: Եւ այնուհետէ սկսան մախողքն Գրիգորիսի զմիմեամբք ելանել, թէ ո՞նտիցի յաթոռն հայրապետական: Եւ Յովհաննէսն՝ զի ընտանի էր թագաւորին Լեւոնի, բռնացաւ և կալաւ: Իբրեւ ետես զայն միւս եպիսկոպոս՝ Անանիա, չոգաւ նա առ սուլտանն, զոր Հռոմոց կոչեն, և ետ նմա կաշառս, և նստաւ կաթողիկոս ի Սեաստ, զի ասէր զինքն յազգէ կաթողիկոսին Պետրոսի, որ կայ թաղեալ անդէն: Եւ այսպէս բաժանեցաւ աթոռ սրբոյն Գրիգորի յերիս՝ մի բունն՝ զոր էառն Յովհաննէս, որ ի Հռոմկլայն, և միւսն ի Սեաստ, զոր ապստամբեցաւ Անանիա, և միւս ևս ի կղզւոջն, որ կոչի Աղթամար՝ Դաւիթ անուն»<sup>7</sup>:

Գանձակեցու հենց այս վկայության արդյունքում է ձևավորվել այն կարծիքը (Մ. Չամչյան, Մ. Օրմանյան և այլք), որ Անանիայի հակաթոռ կաթողիկոսությունը սկզբնավորվել է 1203 թ.՝ Հովհաննես Սսեցու ընտրությունից հետո, Անանիայի դժգոհության պատճառով:

Երկրորդ անգամ Կիրակոս Գանձակեցին Անանիայի անունը տալիս է, երբ իշխան Լեւոն Բ-ը 1197 թ., իր թագադրությանն ընդառաջ, Հռոմի պապի պատվիրակին պատասխանելու համար հրավիրում է Գրիգոր Ապիրատ կաթողիկոսին ու բարձրաստիճան հոգևորականներին և համոզում համապատասխան երդմնագիր տալ, որ ընդունում են պապի դավանաբանական պահանջները. «Եւ արարին եպիսկոպոսքն զբան երդմանն, յորոց մի էր եպիսկոպոսն Տարսունի Ներսէս Լամբրոնեցի... և Յովհաննէս, որ եղև կաթողիկոս, և Անանիա՝ որ եղև հակառակաթոռ ի Սեաստ, և այլք ընդ սոսա»<sup>8</sup>:

Պետք է ասել, որ թեև Կիրակոս Գանձակեցին երկու անգամ նշում է, որ Անանիան կաթողիկոս է եղել Սեբաստիայում, սակայն չի ասում, թե նա մինչ այդ Սեբաստիայի եպիսկոպոսն էր, ինչպես որ տարածվել է գրականության մեջ<sup>9</sup>:

<sup>6</sup> Կիրակոս Գանձակեցի, Պատմություն Հայոց, աշխատասիրությամբ Կ. Մելիք Օհանջանյանի, Երևան, 1961, էջ 147-148: Այս և հաջորդ մեջբերումներում ընդգծումները մերն են – Կ. Մ.:

<sup>7</sup> Կիրակոս Գանձակեցի, էջ 148-149:

<sup>8</sup> Նույն տեղում, էջ 157-158:

<sup>9</sup> Մ. Չամչեան, նշվ. աշխ. էջ 175, Ղ. Ալիշան, Սրտուն, Վենետիկ, 1885, էջ 471, 507, Հ. Աճառյան, Հայոց անձնանունների բառարան, հ. Ա, էջ 163 և այլն:

նա, հավանաբար, Կիլիկիայի եպիսկոպոսներից մեկն էր, այդ պատճառով էլ անմիջական մասնակցություն է ունեցել ինչպես Գրիգոր Քարավեժի դեմ եղած գործողություններին, որպես մեկը նրանցից, որոնք «ակն ունէին ժառանգել զաթոռն», այնպես էլ Լևոն իշխանի հրավիրած հավաքին: Գանձակեցու վկայություններից երևում է, որ արդեն Գրիգոր Քարավեժի դեմ սկսված խարդավանքների ժամանակ Անանիան Հայոց կաթողիկոսական աթոռին հասնելու լուրջ հավակնություն է ունեցել՝ Պետրոս Գետադարձի տոհմից լինելու հիմնավորմամբ:

Անանուն եղեսացին ժամանակով ավելի մոտ է Անանիայի ապրած շրջանին, իր ժամանակագրությունն ավարտել է շուրջ 1240 թ.<sup>10</sup> (Կիրակոս Գանձակեցին իր Պատմությունը գրել է ԺԳ դարի 60-ական թթ. կեսերին): Անանիան հիշատակվում է եղեսացու ժամանակագրության երեք հատվածում, որոնցից առաջինը հետևյալն է. «1511 (1200) թվականին Պոնտոսի կողմերում հայտնվեց մի մարդ կաթողիկոսի ազգականներից, ինչպես ասում են, իրենց Գրիգորիսի ցեղից: Դա մի եպիսկոպոս էր, որի անունն էր Անանա, այսինքն՝ Անանիա: Շատ եպիսկոպոսներ անցան նրա կողմը և նրան կաթողիկոս հռչակեցին: Այդ հյուսիսային երկրները նա անջատեց Հռոմկլայում նստող Ապիրատից: Ասում են, որ նա արժանի էր գահին և հարուստ գիտելիքներ և լեզու ուներ»<sup>11</sup>:

Այս արժեքավոր տեղեկությունը ցույց է տալիս նախ, որ Անանիան կաթողիկոս է դարձել Գրիգոր Ապիրատի գահակալության ժամանակ (թվականի ճշգրտմանը կանգրադառնանք քիչ հետո՝ 1201 թ. հիշատակարանի առնչությամբ): Երկրորդ էական նշումն այն է, որ Անանիայի կաթողիկոսանալով հայաբնակ հյուսիսային շրջաններն անջատվել են Հռոմկլայի աթոռից, որով շեշտվում է հակաթուղության քաղաքական կողմը և որը չէր կարող միայն Անանիայի ցանկությամբ լինել: Ինչպես երևում է, Կիլիկիայի Հայոց թագավորության հետ թշնամական հարաբերություններ ունեցող Ռուսի Ռուբն ադ-Դին Սուլեյմանշահ Բ (1196-1204) սուլթանն Անանիային օգտագործել է իր շահերի համար ու նաև այդ է եղել հակաթուղ կաթողիկոսության ստեղծման պատճառը:

Նախորդ ուսումնասիրողներն անդրադարձել են հակաթուղության առաջացման քաղաքական կողմին: Հ. Բերբերյանը մասնավորապես գրում է. «Անանիայի հերձաժը, նոյնիսկ եթէ անձնական փառասիրութիւնը դեր մը ունեցած ըլլայ անոր մէջ, «ապստամբութիւն» մը ըլլալէ աւելի քաղաքական կացութեան մը պարտադրած լուծումի մը բնոյթ կը ստանայ... Անանիայի կաթողիկոսական աթոռը սելջուքեան պետութեան Հայոց կաթողիկոսական աթոռը եղած է»<sup>12</sup>: Պատմաբան Գազիկ Հարությունյանն ավելի առաջ է գնում և Անանուն եղեսացու

<sup>10</sup> Անանուն եղեսացի, էջ 15:

<sup>11</sup> Նույն տեղում, էջ 193:

<sup>12</sup> Հ. ՊԵՐԲԵՐԿԵԱՆ, նշվ. աշխ. էջ 362:

ժամանակագրության վերոհիշյալ հատվածը մեջբերելուց հետո գրում է, թե «Սեբաստիայի արքեպիսկոպոս Անանիայի այդ գործողությունները ծրագրել էր Իկոնիայի Ռուֆն ադ-Դին Սուլեյմանշահ II իբն Գլիճ-Արսլան սուլթանը»<sup>13</sup>։ Կարծում ենք, որ այս դեպքի՝ սուլթանի «ծրագրած» լինելու մասին պնդումն այնքան էլ համոզիչ չէ։ Մեր կարծիքով, Անանիան, որը հավակնոտ անձնավորություն էր, շատ շուտ հասկացել է, որ ծերացած Գրիգոր Ապիրատից հետո կաթողիկոսական ընտրության ժամանակ չի կարող Սսի արքեպիսկոպոս Հովհաննեսի մրցակիցը լինել, քանի որ վերջինս Լևոն թագավորի մտերիմն էր, Գանձակեցու բնորոշմամբ՝ «ընտանի էր թագավորին Լևոնի», ուստի կաթողիկոս դառնալու խնդրանքով դիմել է Ռուֆն ադ-Դինին (բնականաբար, հանդիպմանը ընծաներ է մատուցել, որը ժամանակի ընդունված կարգն էր)։ և նա տեսնելով, որ դա ձեռնտու է իրեն, համաձայնել է։ Կարճ ասած՝ Անանիայի և սուլթանի շահերը համընկել են, սակայն նախաձեռնությունը, հավանաբար, եկել է առաջինից։

Անանուն եղեսացու փոխանցած տեղեկության մեջ մի անճշտություն կա՝ այն, որ Անանիան ներկայանում էր իբրև «Գրիգորիսի ցեղից» սերած մարդ։ Իրականում, Գրիգորիսի, այսինքն Գրիգոր Լուսավորչի տոհմակից էին իրենց համարում այսպես կոչված «Պահլավունի» կաթողիկոսները՝ սկսած Գրիգոր Բ Վկայասերից (1066-1105), այնուհետև նրա քրոջ թոռներից (Գրիգոր Գ, Ներսես Դ), մինչև Գրիգոր Ապիրատ։ Իսկ Անանիան, ինչպես տեսանք Գանձակեցու հայտնածից, իրեն համարում էր կաթողիկոս Պետրոս Գետադարձի տոհմից<sup>14</sup>։ Նկատենք, որ թեև Անանուն եղեսացու տեղեկությունը անվան հարցում սխալ է, սակայն երևույթը ներկայացնելու առումով միանգամայն ներդաշնակ է Կիրակոս Գանձակեցու հայտնածին։ Դա այն է, որ Անանիան կաթողիկոսական աթոռի նկատմամբ ունեցած իր հավակնությունը հիմնավորել է տոհմական ծագումով։

Անանուն եղեսացու երկրորդ տեղեկությունը վերաբերում է Գրիգոր Ապիրատի մահվանը և հաջորդող դեպքերին, որտեղ կրկին հիշատակվում է Անանիան. «1514 (1203) թվականին Կիլիկիո երկրում մեռավ Հայոց կաթողիկոսը, որի անունն էր Ապիրատ...։ նրանից հետո գահին տիրեց Հովհաննես անունով մեկը, որը ոչ թե նրանց (նկատի ունի «Պահլավունի» կաթողիկոսներին — Կ. Մ.), այլ Կիլիկիայի իշխանների ցեղից էր, որոնք այժմ էլ կանգնած են իշխանության գլուխ։ Որոշ ժամանակ անց Հովհաննես կաթողիկոսի խնդրանքով Ռումի երկրի սուլթանը պաշտոնազրկեց Անանիային։ Եվ այդ երկրները կցվեցին նրան»<sup>15</sup>։ Այս

<sup>13</sup> Հայոց պատմություն, հ. II, գիրք երկրորդ, Երևան, 2014, էջ 360 (ենթաբաժնի հեղինակ՝ Գ. Հարությունյան)։

<sup>14</sup> Տեղին է հիշել, որ ժամանակին Փիլարտոս Վարաժնունին կաթողիկոս Գրիգոր Բ Վկայասերի համաձայնությամբ Հոնիում կաթողիկոս է ընտրել Պետրոս Գետադարձի քրոջ որդի Սարգսին (1076-78), տե՛ս Մաթևոս Ուտնայեցի, *Ժամանակագրություն*, Երևան, 1991, էջ 226, 232։

<sup>15</sup> Անանուն եղեսացի, էջ 193-194։

տեղեկությունը ցույց է տալիս, որ Հովհաննեսի և Անանիայի միջև հակամարտությունը շարունակվել է, սակայն արդյունքի մասին Անանուն եղեսացու հաղորդումը թե սուլթանը պաշտոնագրկել է Անանիային, հերքվում է ժամանակագրի հենց հաջորդ վկայությամբ:

«1516 (1205) թվականին Կիլիկիայի իշխան Լևոն հայը դիմեց Խոսրովշահին, որը տիրում էր Կապադովկիայի երկրում, և պահանջեց Անանիային: Սա, ինչպես նշեցինք, կաթողիկոս էր դարձել այն կողմերում և անջատվել այս կողմերի կաթողիկոսից՝ նգովելով վերջինիս և չեղյալ հայտարարելով նրա կաթողիկոսությունը»<sup>16</sup>: Ինչպես տեսնում ենք, Անանիան շարունակել է աթոռակալել նաև Ռուքն ադ-Դինի եղբոր՝ Ղիյաս ադ-Դին Քեյխոսրով Ա-ի (1205-1211) ժամանակ, և նրա հակաթուռ կաթողիկոսության վերացման համար ջանքեր է գործադրել նաև Լևոն թագավորը: Սա նշանակում է, որ ոչ միայն Հայոց հոգևոր, այլև աշխարհիկ իշխանությունը, գիտակցելով Անանիայի պառակտիչ գործունեության վտանգը, փորձում էր չեզոքացնել այն: Պատահական չէ, որ Փանձակեցին Անանիայի հակաթուռությունը բնութագրում է որպես ապստամբություն («զոր ապստամբեցա՛ն Անանիա»): Այնուամենայնիվ, Անանիան շարունակել է աթոռակալել և որպես կաթողիկոս հիշատակվում է նաև հետագա շրջանում՝ 1211, 1223, 1227 թվականներին:

### Հիշատակարանները և Թեոդորոս Կեսարացու վկայաբանությունը

Հայերեն ձեռագրերի հիշատակարանների տվյալները մեծապես արժանահավատ են, քանի որ դրանց հեղինակները ոչ թե տեղեկություններ են հաղորդում տասնամյակներ առաջ տեղի ունեցած դեպքերի կամ անցած-գնացած մարդկանց մասին, այլ արձանագրում են հենց հիշատակարանի գրության ժամանակի տվյալ տարվա փաստերը: Այդպիսի հատկանշական օրինակ է 1201 թ. Դարանաղյաց գավառի Ավագ վանքում ընդօրինակված Ավետարանում (ձեռ. ՄՄ 10359) Ստեփանոս գրչի ձեռքով գրված հիշատակարանը, որտեղ մասնավորապես ասվում է. «Ի վեցհարիւրորդի յիսներորդի թուաբերութեանս Հայոց նոր տումարիս (1201), ի գաւառիս Դարանաղեաց, առ ստորոտով լերինս Սեպոհի, ի հրեշտակաւրան անապատիս կոչեցելոյ Աւագ վանք... Արդ, ի հինգերորդ ամի թագաւորութեան Հայոց Ղեւովն յաղթող եւ բարեպաշտի... եւ ի հայրապետութեան տեառն Գրիգորիսի, որ եւ յայսմ ամի երկուս բաժանի՝ եւ նստի Անանէ է ի Կեսարիա»<sup>17</sup>:

<sup>16</sup> Նույն տեղում, էջ 194:

<sup>17</sup> Հայերեն ձեռագրերի հիշատակարաններ, ԺԳ դար, կազմեց Ա. Մաթևոսյան, Երևան, 1984, էջ 12: Թվականի առնչությամբ հիշատակագրի նշումը, թե Լևոնի թագավորության 5-րդ տարին էր, որոշ շեղումով է, քանի որ 1198-ից հաշված 1201-ը զանաակալության չորրորդ տարին է:

Հիշատակարանն առաջին անգամ հրապարակած Հայկ Բերբերյանն այստեղից իրավացիորեն եզրակացրել է, որ Անանիան հակաթոռ կաթողիկոս է դարձել ոչ թե Գրիգոր Ապիրատի մահից հետո և Հովհաննես Սսեցու ընտրությունից դժգոհ մնալով՝ 1203 թ., այլ դրանից առաջ<sup>18</sup>։ Ինչպես տեսանք, այս եզրակացությունն են հանգեցնում նաև Անանուն Եդեսացու վկայությունները։ Սակայն հիշատակարանում Կեսարիայի՝ որպես Անանիայի առաջին նստավայրի մասին հիշատակումը շատ կարևոր է։ Այն ավելի մոտ էր Կիլիկիայի սահմաններին և գուցե նաև դրանով պետք է բացատրել Հովհաննես Սսեցու և Լևոն թագավորի անհանդուրժող վերաբերմունքն Անանիայի նկատմամբ։

Ինչ վերաբերում է հակաթոռության սկզբնավորման թվականին՝ 1200 թ. (Անանուն Եդեսացի), թե 1201 թ. (Ստեփանոս գրիչ), ապա կարծում ենք առավելությունը պետք է տալ վերջինին։ Նախ, որովհետև ասորի պատմիչը գրել է տասնամյակների հեռվից, իր խոսքը սկսում է նախընթաց վիճակը ներկայացնելով «1200 թվականին Պոնտոսի կողմերում հայտնվեց մի մարդ... շատ եպիսկոպոսներ անցան նրա կողմը» և այլն։ Իսկ Ստեփանոս գրիչը ձեռագրի գրչությունն ավարտելով, փաստագրում է իր ժամանակի իրողությունները, նշում, որ գրել է կաթողիկոս Գրիգորի (Գրիգոր Ապիրատ) ժամանակ, բայց հենց այդ տարում՝ «յայսմ ամի» կաթողիկոսությունը երկու մասի է բաժանվել և «Անանէն» որպես կաթողիկոս նստել է Կեսարիայում։

Ժամանակագրական առումով Անանիային նշող հաջորդ հիշատակարանը 1203 թվականից է, գրված Խաղտեաց երկրում, որը Փոքր Հայքի հյուսիսում է։ «Արդ, ես ծառայս Աստուծոյ Յովնաննէս սկսայ զսուրբ Աւետարանս և կատարեցի ի ՈՅԲ (1203) թուականիս, ի կաթողիկոսութեան տէր Անանիայի, և յառաջնորդութեան տէր Մխիթարայ՝ երկրիս Խաղտեաց, ի փոքր մենաստանիս որ կոչի Ալնոցի վանք»<sup>19</sup>։ Ինչպես տեսնում ենք, գրիչ Հովհաննեսի համար միակ կաթողիկոսն Անանիան է։

Այս երկու հիշատակարանից հետո Անանիայի մասին հաջորդ կարևոր սկզբնաղբյուրը Թեոդորոս Կեսարացու վկայաբանությունն է, որի նահատակությունը տեղի է ունեցել 1204 թ. Կեսարիայում<sup>20</sup>։ Հայ երիտասարդ Թեոդորոսի մահմեդականություն ընդունելու, ապա այդ կրոնից հրաժարվելու և այդ պատճառով մահվան դատապարտվելու մասին է ընդարձակ վկայաբանությունը, որը

<sup>18</sup> Հ. Պէրպէեան, նշվ. աշխ. էջ 360։

<sup>19</sup> Հայերեն ձեռագրերի հիշատակարաններ, ԺԳ դար, էջ 35։

<sup>20</sup> Ռումի սուլթանությունում հայերի կարգավիճակի և Թեոդորոսի վկայաբանության մասին տե՛ս S. Peter Cowe, "The Armenian Community of the Konia Region in the Seljuk Period," in: *Armenian Communities of Asia Minor* (Historic Armenian Cities and Provinces, ed. by Richard G. Hovannisian, Vol. 13), Costa Mesa, 2014, Chapter 3, pp. 89-106։

շարադրված է այդ ժանրին հատուկ ոճով<sup>21</sup>: Դեպքի մանրամասներից մեկն այն է, որ Թեոդորոսի բանտում եղած ժամանակ նրան է այցելում Գևորգ անունով քահանան, և նա խնդրում է իր մասին պատմել կաթողիկոսին և աղոթել իր համար՝ «երթացես ի վանս հայրապետին մերոյ առ եպիսկոպոսապետն և տէրն իմ Անանիաս, և պատմեսցես նմա զամենայն անցս աղետից և զկիրս շարշարանաց անձին իմոյ. և աղաչեա զնա աղօթս առնել ի վերայ իմ»<sup>22</sup>: Քահանան աճապարում է «առ կաթողիկոս Հայոց»: Այստեղ վկայաբանության հեղինակը մի գովաբանական հատված է նվիրում Անանիային՝ ցույց տալով նրա խնամածու վերաբերմունքը կարոտյալների ու տառապալանների նկատմամբ: Այնուհետև ասվում է, որ կաթողիկոսը հավաքում է եպիսկոպոսներին, վարդապետներին ու բոլոր եկեղեցականներին և երեք ժամ աղոթում են Թեոդորոսի համար, ապա նույն քահանային հետ են ուղարկում՝ հայրապետի զորակցությունը հայտնելու Թեոդորոսին, նաև նրա հետ դնում «կերակուր ինչ ի պէտս մարմնոյ»<sup>23</sup>:

Անանիան հիշվում է նաև վկայաբանության վերջում: Երբ երկրորդ անգամ քրիստոնեությունը չուրանալու համար քարկոծելով սպանում են Թեոդորոսին, որից հետո նրա մարմնի վրա պայծառ լույս է երևում, որը տեսնելով դահիճները սարսափած փախչում են, Ռուքն աղ-Դինը հրամայում է Անանիային նահատակի դին հողին հանձնել. «Եւ Շահ Ռուզնատին իմացեալ զեղեալսն՝ հրաման ետ Անանիայ հայրապետի փութով բառնալ և թաղել զնա»<sup>24</sup>: Գնում են, հուղարկավորում նահատակին «յարժանաւոր տեղոջ», որից հետո, ըստ հեղինակի՝ գերեզմանի վրա հրաշքներ և հիվանդների բժշկություններ են լինում:

Սույն վկայաբանությունից երևում է, որ Անանիայի նստավայրն այդ ժամանակ շարունակում էր մնալ Կեսարիան<sup>25</sup>: Ի դեպ, վկայաբանության մեջ Կեսա-

<sup>21</sup> Հակիրճ, պատմությունը հետևյալն է. ծնունդով կեսարացի Թեոդորոսը պարտով փող է վերցնում, բայց վատնում է ու չի կարողանում վերադարձնել, գործը հասնում է մահմեդական դատավորին: Պատժից խուսափելու և պարտից ազատվելու համար նա ուրանում է քրիստոնեությունը և մահմեդականություն ընդունում: Հետո զոջում է, հեռանում այլ փոքր քաղաք և նորից քրիստոնյա դառնում: Ժամանակ անց, կեսարացի մահմեդական մեկը տեսնում է նրան, հանաչում, բացահայտվում է այս անգամ մահմեդականությունից հրաժարումը: Բռնում բերում են Կեսարիա, նույն դատավորի մոտ, որը կրկին համոզում է նրան մահմեդական դառնալ, բայց ո՛չ հորդորները, ո՛չ սպառնալիքներն ու կտտամբները Թեոդորոսի որոշումը չեն փոխում: Նրան փորձում է համոզել նաև քաղավորը, սակայն ապարդյուն: Ի վերջո, Թեոդորոսին ֆարկոծելով սպանում են: Վկայաբանությունը բավական ընդարձակ է, հիմնական տեխստը դատավորի ու Թեոդորոսի երկխոսություններն են՝ վերջինիս երկարաբան ֆարզական բնույթի խոսքերով (Հայոց նոր վկաները (1155-1843), հ. Ա, աշխատութեամբ Զ. Մանանդեանի եւ Հ. Աճառեանի, Վաղարշապատ, 1903, էջ 73-92):

<sup>22</sup> Հայոց նոր վկաները, էջ 84:

<sup>23</sup> Նույն տեղում, էջ 85:

<sup>24</sup> Նույն տեղում, էջ 92:

<sup>25</sup> Հ. Պերպերեան, նշվ. աշխ. էջ 360:



րիայի մասին ասվում է՝ «որ է աթոռ հայրապետական և թագաւորական, և ամենայն քաղաքաց Յունաց գահերիցագոյն»<sup>26</sup>, նկատի ունենալով այդ քաղաքի փառավոր անցյալը և կարեւորությունը քրիստոնեական եկեղեցու համար: Հավանաբար նաև այդ հանգամանքը հաշվի առնելով է Անանիան իր աթոռը հաստատել Կեսարիայում:

Թեոդորոս Կեսարացու վկայաբանությունը՝ Անանիայի առնչությամբ, անդրադարձել են բոլոր նախորդ ուսումնասիրողները (Մ. Չամչյան, Մ. Օրմանյան, Հ. Բերբերյան), այն դիտարկելով որպես վերջինիս մասին մի սկզբնաղբյուր: Սակայն բնագրի ուսումնասիրությունը մեզ հանգեցրել է այն եզրակացության, որ վկայաբանության և Անանիայի կապն ավելի խորն է, և որ վկայաբանությունը գրի է առնվել հենց Անանիայի պատվերով: Հատկապես ուշադրավ է, որ վկայաբանության սկզբնամասում՝ ժամանակի իրավիճակը ներկայացնող հատվածում, փառաբանվում է սուլթան Ռուքն ադ-Դինը. «Ընդ ժամանակս բռնակալութեան մեծի արքային Տաճկաստանի Սուլիման Շահ Սուլտան Ռուզնատնին, որ բազում հանդէս քաջութեան և յաղթութեան պատերազմի ցուցեալ յաւուրս ժամանակաց իւրոց, և յաչս յոքունց մեծարեալ ահարկանելով ամենայն թագաւորաց տիեզերաց: Սա որդի գոլով մեծ և յաղթող ինքնակալ իւրիճ Ասլան սուլտանի, ուստի գրաւեալ սորա ընդ իշխանութեամբ տէրութեանն իւրոյ կողմանս հիւսիսոյ, սկսեալ ի Կեսարացոց մայրաքաղաքէն մինչև ի մեծն Բիւզանդիոն, որ այժմ կոչի Կոստանդինուպօլիս, ունելով ընդ իշխանութեամբ զՊոնտոս և զՍեբաստիա և զամենայն զեմենտացոց և զՏրապիզոնտացոց զտէրութիւնն, և հասեալ մինչև ի մեծ և ի հոշակաւոր քաղաքն Թէոդուպօլիս, որ կոչի Կարնոյ քաղաք, նուաճեաց ընդ գաւազանաւ զեկեղեաց և զԴարանաղեաց, արկ ընդ ձեռամբ զիշխանն Մովսէս, փութացաւ մինչև ի լայնանիստ քաղաքն Մելիտենի, մերձ ի սահմանսն Եգեսացոց, համարձակեցայց ասել թէ և զամենայն աշխարհ, տիրելով ի վերայ ամենայն հայրենական աշխարհաց իւրոց»<sup>27</sup>:

Այս հատվածն ակնհայտորեն ցույց է տալիս, որ վկայաբանությունը շարադրվել է տեղում, այսինքն՝ հենց Կեսարիայում ապրող հայ հոգևորականի ձեռամբ: Հեղինակը, որը գրվածքից գատելով, բանիմաց և կրթված անձնավորություն էր<sup>28</sup>, քաջ ծանոթ է եղել ժամանակի ռազմաքաղաքական անցուղարձին, գրում է որպես ականատես, քրիստոնեության ջերմեռանդ պաշտպան է, մի կողմից սգում է նահատակ Թեոդորոսի համար, բայց մյուս կողմից՝ փառաբանում

<sup>26</sup> Հայոց նոր վկաները, էջ 75:

<sup>27</sup> Նույն տեղում, էջ 74-75:

<sup>28</sup> Վարձագրական գրականության հմուտ հետազոտող Քնարիկ Տեր-Դավթյանը շատ բարձր է գնահատում Թեոդորոս Կեսարացու վկայաբանության հեղինակին (Ք. Տեր-Դավթյան, Հայկական սրբախոսություն վարքեր և վկայաբանություններ (V-XVIII դդ.), Երևան, 2011, էջ 321-323):

Ռուքն ադ-Դինին: Պետք է ասել, որ մահմեդական իշխանավորի նման մեծարական ներկայացումը հատուկ չէ վարքագրական գրականությանը: Մեր ենթագրությունը, թե թեոգորոս Կեսարացու վկայաբանությունը շարադրվել է Անանիա հակաթուղ կաթողիկոսի հանձնարարությամբ, հիմնված է նաև այն հանգամանքի վրա, որ նա այստեղ, փաստորեն, հանդես է գալիս որպես տեղի հայերի հոգևոր ապավեն, նաև շեշտվում է, որ թեոգորոսի մարմինը հողին հանձնելու հրամանը նա ստացել է անձամբ սուլթանից: Ռուքն ադ-Դինին նվիրված վերոնշյալ գովաբանական հատվածն ակնառու կերպով առանձնանում է թեոգորոսի նահատակության ողբերգական պատմության ընդհանուր համատեքստից, ուստի կարծում ենք, որ այն տեղ է գտել վկայաբանության մեջ պատվիրատուի ցանկությամբ քաղաքական նկատառումներով:

Անանիայի մասին հաջորդ հիշատակարանը 1211 թվականից է, գրված Սեբաստիայում Հայրապետ գրչի ձեռքով. «Արդ, գրեցաւ սուրբ Աւետարանս ձեռամբ Հայրապետի նուաստի քահանայի ըստ աշխարհի, ընդ հովանեաւ Սուրբ Աստուածածնին և Սուրբ Սարգսի զաւրավարին, որ յանուն սոցա կանգնեցաւ սուրբ եկեղեցիս ի քաղաքիս Սեբաստիա»<sup>29</sup>: Գրիչը ժամանակի կաթողիկոսին նշելիս սրամիտ դիտարկում է անում՝ ասելով, որ չգիտի, թե ում անունը գրի, և նշում է իրար հակառակ երեք կաթողիկոսներին՝ Հովհաննես, Անանե, Դավիթ: Այստեղ հիշված Դավիթը՝ Արքակաղնեցին է, որին Լևոն թագավորը 1207 թ. Սսում կաթողիկոս էր դարձրել, Հովհաննես Սսեցու հետ գժտվելու պատճառով<sup>30</sup>: «Արդ, ի հայրապետութեանն՝ ոչ գիտեմ ասել, եթե զում գրեցից անուն, այլ ասեմ թե երից հակառակաց՝ տէր Յովհաննիսի, տէր Անանէի եւ տէր Դավթի, իսկ ի մերում դիտապետութեանս՝ տէր Գրիգորի սուրբ եւ ընտրեալ եպիսկոպոսի, որ է հրեշտակ ի մարմնի, եւ զարմ մեծի եւ հռչակաւոր վարդապետի»<sup>31</sup>: Կաթողիկոսների թվարկումից հետո, ինչպես տեսնում ենք, գրիչը մեծարանքով նշում է Սեբաստիայի եպիսկոպոս Գրիգորին: Հիշատակարանի այս հատվածից կարելի է դատել, որ 1211 թ. Անանիան շարունակում էր գտնվել Կեսարիայում, որովհետև նրա Սեբաստիայում լինելու դեպքում Հայրապետ գրիչը դժվար թե այսպիսի ձևակերպումներ օգտագործեր:

Անանիայի վերաբերյալ չորրորդ և վերջին հիշատակարանը 1223 թվականից է, գրված Գրիգոր գրչի ձեռքով Մնձրո Մարգ կոչված գավառի «Առոյծ Մարգ» գյուղում. «Բայց գրեցաւ ի թուականիս Հայոց ՈՂԲ (1223), յերրորդում

<sup>29</sup> Հայերեն ձեռագրերի հիշատակարաններ, ԺԳ դար, էջ 75:

<sup>30</sup> Ըստ վերջերս շրջանառված տեսակետի, հնարավոր է, որ Դավիթ Արքակաղնեցին կաթողիկոս է դարձել 1204/5 թ. (Վ. Թորոսյան, «Սսի ԺԳ դարասկզբի եկեղեցական ժողովը հայլատին հաւաքեւոյթյունների համատեքստում», Գեղարվեստի ակադեմիայի տարեգիրք, թիվ 11, Երևան, 2021, էջ 136-138):

<sup>31</sup> Հայերեն ձեռագրերի հիշատակարաններ, ԺԳ դար, էջ 75:

ամի հայրապետութեան տէր Անանի Հայոց կաթողիկոսի, ի գաւառիս Մնձրոյ Մարգ, ի գեղս որ կոչի Առոյծ Մարգ, ընդ հովանեաւ Սուրբ Աստուածածնին եւ Սրբոյն Գրիգոր եւ Սրբոյն Յակոբայ»<sup>32</sup>:

Հիշատակարանն առաջին անգամ հրատարակել է Զավեն վրդ. Արզումանյանը «Սիրոն» ամսագրում, որտեղ «յերրորդում ամի հայրապետութեան տէր Անանի Հայոց կաթողիկոսի» հատվածը նկատի ունենալով, կարծում է, թե հիշատակարանի 1223 թվականը սխալ է: Ըստ նրա, քանի որ Անանիան աթոռակալել է 1203-ից՝ «հետևաբար ձեռագիրս գրուած պէտք է ըլլայ 1206 թուին»<sup>33</sup>: Ամսագրի խմբագրութեան անունից արված ծանոթագրութեան մեջ նորայր Պողարյանն էլ նշում է. «Ձեռագրիս յիշատակարանի ՈՂԲ թուականը եթե ճիշդ է, այդ պարագային պէտք է ընդունիլ, որ Անանիա կաթողիկոսի 20-րդ տարին կըլլայ, առաջին տարին ընդունելով 1203-ը: Այս պարագային յիշատակարանի «յերրորդում ամի» բացատրութեան տեղ սպասելի էր Ի երրորդում ամի, այսինքն՝ քսաներորդում ամի»<sup>34</sup>: Հ. Բերբերյանը նկատում է, որ Անանիայի կաթողիկոսութեան սկիզբը ոչ թե 1203, այլ 1201 թվականն է, հնարավոր համարելով, որ հիշատակարանի հրատարակիչը գուցե ՈՂԲ (1203)-ի փոխարեն ՈՂԲ (1223) է կարդացել կամ հիշատակարանի հեղինակն է սխալվել<sup>35</sup>: Ավելացնենք, որ ավելի ուշ հիշատակարանը ՈՂԲ (1223) թվականով է հրատարակել նաև Ավետիս Սանջյանը (ձեռագրի նկարագրութեան հետ միասին)<sup>36</sup>:

### Անանիայի մահը և հակաթոռ կաթողիկոսության վերացումը

Անանիայի մահվան թվականի և հակաթոռ կաթողիկոսության գործունեության ավարտի, ինչպես նաև մի քանի այլ հարցերի պարզաբանման համար կարևոր նշանակություն ունի Սյունյաց մետրոպոլիտ Ստեփանոս Օրբելյանի (մահ. 1303 թ.) ժամանակագրության մեջ պահպանված մի տեղեկություն: Հայտնի է, որ 13-րդ դարի վերջերին (1297 թ.) Ստեփանոս Օրբելյանն իր կոթողային աշխատությունը՝ «Սյունիքի պատմությունը» շարագրելուց առաջ, շուրջ մեկ դարյա պատմական անցքերի մասին տարբեր աղբյուրներից քաղված տեղեկություններով լրացրել է ԺԲ դարի պատմիչ Սամվել Անեցու ժամանակագրու-

<sup>32</sup> Նույն տեղում, էջ 139: Տե՛ս նաև Հ. Պերպերեան, նշվ. աշխ. էջ 361:

<sup>33</sup> Զ. Արզումանեան, «ԺԳ. դարու հայերէն ձեռագիր մը Public Library, Detroit, Michigan», Սիրոն, 1962, համար 11-12, էջ 307-808:

<sup>34</sup> Նույն տեղում, էջ 308:

<sup>35</sup> Հ. Պերպերեան, նշվ. աշխ. էջ 361:

<sup>36</sup> A. Sanjian, *A Catalogue of Medieval Armenian Manuscripts in the United States*, Berkeley, Los Angeles, London: University of California Press, 1976, pp. 387-391.

թյունը<sup>37</sup>: Այն պահպանվել է մեկ ընդօրինակությամբ, հավանաբար ժե դարում ստեղծված մի արժեքավոր ժողովածուի մեջ (ՄՄ 8481): Այստեղ նշված են հիմնականում հակիրճ տեղեկություններ, որոնք գրված են ժամանակագրական աղյուսակի նեղ սյունակում: Ներկայացվող հատվածը տեղ է գտել Հայոց ՈՀԶ (1227) թվականի դիմաց<sup>38</sup>, բայց հայտնի չէ, թե ինչ աղբյուրից է քաղված: Այն հետևյալն է.

«Խայտն կոչեցեալ<sup>39</sup> Աննա ուժով սուլտանին նստի կաթողիկոս ի Հռոմ, հակառակ աթոռոյն Կոստանդեա և դապալեաց զկաթողիկոսութիւնն, որ և յետ բազում հնարից, աղօթիւք խնդրէ տէր Կոստանդին բառնալ յերկուցն միսն, և որ հաճոյն է Տեառն մնալ և միամտել: Ապա ի տեսլեան հրեշտակ Տեառն գրէ յաջ թաթի ձեռինն տէր Կոստանդնայ՝ եթէ բարձցի կաթողիկոսութիւն յԱննայ է և տացի Կոստանդնայ ծառայի Աստուծոյ, և եղև այնպէս, զի ի գիշերի սատակեալ այրն այն, բարձաւ ի միջոյ»<sup>40</sup>:

Սույն հատվածի մասին բնագրի երկրորդ հրատարակիչ Վազգեն Հակոբյա-

<sup>37</sup> Ժամանակագրության հեղինակի հարցը հայագիտության մեջ վիճարկվել է: Առաջին հրատարակիչ Աշոտ Աբրահամյանն այն համարել է Ստեփանոս Օրբելյանինը (Ժամանակագրութիւն Ստեփաննոսի Օրբելեանի, հրատարակության պատրաստեց Ա. Աբրահամյանը, Երևան, 1942), մինչդեռ երկրորդ հրատարակիչ Վազգեն Հակոբյանը այն կոչել է «Ստեփանոս եպիսկոպոսի ժամանակագրություն» հեղինակին համարելով Օրբելյանից տարբեր սյունեցի մեկ այլ եպիսկոպոս (Մանր ժամանակագրություններ, հ. 1, էջ 32-34): Սակայն նորագույն ուսումնասիրությունները ոչ մի կասկած չեն թողնում, որ հեղինակը հենց Ստեփանոս Օրբելյանն է: Նշենք, որ ժամանակագրության մեջ հեղինակն իրեն կոչում է «այցելու», այսինքն՝ եպիսկոպոս՝ «ես՝ նուսստ Ստեփաննոս անուամբ այցելու»: Ստեփանոս Օրբելյանը «Սյունիքի պատմության» վերնագրում նույնպես կոչվում է «այցելու»՝ «Հանդես բանից հաղցրավեպ պատմութեանց Տանն Սիսական... նուսստ եւ այցիկար ոգոյ Ստեփաննոսի Սիւնեաց այցելութի եւ նախագան մետրապպալտի...» (ՄՄ 6271, 7բ), այդպես է կոչվում նաև 1299-ին գրած «Ողբ ի Ս. Կաթողիկեն» չափածո երկի վերնագրում՝ «Բան բարառնական ոգեալ դիմառնաբար ի դիմաց Վաղարշապատու Ս. Կաթողիկէին... շարեալ... ի Ստեփաննոս Սիւնեաց այցելութ», ինչպես նաև իր վերջին՝ «Հակաճառութիւն ընդդէմ երկաբնակաց» (1302 թ.) երկի վերնագրում՝ «Տեառն Ստեփաննոսի Սիւնեաց այցելութի եւ նախագան մետրապպալտի...»: Վերջապես Օրբելյանին «այցելու» է կոչում նաև Գլաձորի համալսարանի ուսուցչապետ Եսայի Նչեցին, նրա պատվերով գրած գործի նախաբանում. «Տէր Ստեփաննոս՝ այցելու եւ վերադիտող գերահռչակ... արթոյ Տանդ Սիւնեաց» (ՄՄ 1276, 3ա, 176ա): Տե՛ս Մամուլ Անեցի եւ շարունակողներ, Ժամանակագրութիւն, աշխատասիրությամբ Կ. Մաթևոսյանի, Երևան, 2014, էջ 44-50, Կ. Մաթևոսյան, Նորավանքի վիմագրերը և հիշատակարանները, Երևան, «Մուլին» հրատ., 2017, էջ 33-37:

<sup>38</sup> ՄՄ 8481, 206բ: Նշված հատվածի բնագրում, էջի կենտրոնում եղած թվաշարի մյուս կողմում ՈՀԶ (1227) թվականի դիմաց նշված է՝ «մեռաւ արաբակ Իվանէ»: Որ Իվանէ Զաքարյանը մահացել է 1227 թ., հայտնի է նաև այլ աղբյուրներից, այսինքն Անանիայի մահվան մասին նշումը համապատասխանում է այդ տարվան:

<sup>39</sup> Բնագրում՝ «կոցեցեալ»:

<sup>40</sup> ՄՄ 8481, 206բ, հմմտ. Ժամանակագրութիւն Ստեփաննոսի Օրբելեանի, էջ 24, Մանր ժամանակագրութիւններ, հ. 1, էջ 40:

նը հետևյալ ծանոթագրությունն է կատարել. «Այս ավանդությունն ըստ երևույթին տարածված չի եղել, որը հայտնի չի Չամչյանին և Օրմանյանին»<sup>41</sup>: Ակնհայտ է, որ այստեղ խոսքը Անանիայի մասին է, որն այս դեպքում համարվում է կաթողիկոս Կոստանդին Բարձրբերդցու (1221-1267) հակաթոռ՝ «հակառակ աթոռոյն Կոստանդեա»:

Տեղեկության տեքստը հետաքրքրական է մի քանի առումով: Նախ բնագրական որոշ նրբերանգներ ցույց են տալիս, որ այն ձեռագրից ձեռագիր անցնելով և ընդօրինակվելով որոշ փոփոխությունների է ենթարկվել: Մասնավորապես, «Հոռոմը» դարձել է Հռոմ՝ «ուժով սուլտանին նստի կաթողիկոս ի Հռոմ» (հմմտ. Գանձակեցու հաղորդումը՝ «Անանիա, չոգաւ նա առ սուլտանն, զոր Հռոմոց կոչեն... նստաւ կաթողիկոս»): «Անանիա» անունն էլ դարձել է «Աննա», հնարավոր է նախօրինակում երկրորդ «ա» տառի սղագրված լինելու կամ մեկ այլ պատճառով<sup>42</sup>: Պետք է նկատել, որ Անանիայի անունն, ըստ երևույթին, արտասանության որոշ յուրահատկություն է ունեցել: Հիշենք Անանուն եղեսացու տեղեկությունը, որը գրում է՝ «դա մի եպիսկոպոս էր, որի անունն էր Անանա» և բացատրում՝ «այսինքն՝ Անանիա»<sup>43</sup>: Շատ հնարավոր է, որ Ստեփանոս Օրբելյանի օգտագործած աղբյուրում հենց «Անանա» ձևն է եղել, որն ավելի հեշտությամբ կարող էր դառնալ «Աննա»: Ինչպես վերը տեսանք, գրիչ Գրիգորն էլ 1223 թ. նրան կոչում է «Անան»:

Շարունակության մեջ երևում է, որ Կոստանդին կաթողիկոսը փորձել է հնազանդության բերել Անանիային (ինչպես որ ավելի վաղ արել էին կաթողիկոս Հովհաննես Սսեցին և Լևոն թագավորը), սակայն՝ «յետ բազում հնարից», արդյունքի չհասնելով, դիմել է Աստծո տնօրինությանը՝ «աղօթիւք խնդրէ տէր Կոստանդին՝ բառնալ յերկուցն մինն, և որ հաճոյն է Տեառն մնալ և միամտել»։ Ի վերջո հարցը լուծվել է տեսիլքում հայտնված Աստծո հրեշտակի միջոցով, որը Կոստանդին ձեռքին գրել է, որ կվերանա Անանիայի կաթողիկոսությունը, և նույն գիշեր վերջինս մահացել է:

Այս տեղեկությունն ուշագրավ է նաև նրանով, որ միակը լինելով, պահպանել է Անանիայի մականունը՝ «Խայտն կոչեցեալ»։ «Խայտ» բառի ստուգաբանությունից ելնելով (բիծ, նշան մաշկի վրա) հնարավոր է ենթադրել, որ Անանիան դեմքին խալ է ունեցել, որից էլ առաջացել է նրա «Խայտ» մականունը:

<sup>41</sup> Մանր ժամանակագրություններ, հ. 1, էջ 57:

<sup>42</sup> Այդ վրիպակները կարող էին լինել տեղեկության մինչև Ստեփանոս Օրբելյանին հասնելը, բայց ավելի հավանական է, որ առաջացել են նրանից հետո, քանի որ մեզ հասած ժե դարի ձեռագրում, որտեղ ընդօրինակվել է ժամանակագրությունը, այն ունի նաև այլ վրիպումներ, օրինակ, Դրագարիի փոխառեն գրված է «Դրագարդն», մեկ այլ տեղում՝ «գԿեսարիա»-ն դարձել է «գԼասարիա» (Մանր ժամանակագրություններ, հ. 1, էջ 41, 48): Այսինքն, ընդօրինակող գրիչը սահմանափակ գիտելիքների տեղ մեկն է եղել:

<sup>43</sup> Անանուն եղեսացի, էջ 193:

Սակայն Անանիայի կենսագրության համար ամենակարևոր տվյալն այստեղ նրա մահվան թվականն է, որը նաև հակաթոռ կաթողիկոսության ավարտի տարին է: Այն, որ Անանիայից հետո հակաթոռ կաթողիկոսության գործունեությունը դադարել է, երևում է նշված տեղեկության համատեքստից ու որոշ մանրամասներից, օրինակ, երբ ասվում է, թե Կոստանդինը Աստծուց խնդրում է «բառնալ յերկուցն մինն, և որ հաճոյն է Տեառն՝ մնալ և միամտել», այսինքն, մեկը պիտի մնա և միաբան (միամիտ) լինեն: Հրեշտակը Կոստանդինի ձեռքին գրում է, թե՝ «բարձցի կաթողիկոսութիւնն յԱննայէ», այսինքն՝ կաթողիկոսությունը կվերանա Անանիայից, իսկ նրա մահվան կապակցությամբ էլ նշվում է՝ «սատակեալ այրն այն, բարձաւ ի միջոյ», ասել է թե հակաթոռությունն էլ մեջտեղից վերացավ:

Հ. Բերբերյանն Անանիայի՝ որպես կաթողիկոսի, հաջորդ ունեցած լինելու հարցի մասին գրում է. «կարելի չէ ըսել թէ իրմով վերջ գտա՞ծ է այս հերձուած կաթողիկոսութիւնը, թէ Անանիա իր յաջորդը ունեցած է»<sup>44</sup>: Ապա աթոռի հնարավոր շարունակության մասին նշում է. «1243-ին Մոնկոլները պարտութեան մատնեցին սելուքեան բանակները և սելուքեան պետութիւնը ենթարկուեցաւ մոնկոլական տիրապետութեան: Քիչ ետք Հեթում թագաւոր կամովին ընդունեցաւ մոնկոլական գերիշխանութիւնը և հովանաւորութիւնը: Հավանական է, որ սելուքեան արգելքը դադրած ըլլայ 1243-էն ետք, և Ամենայն Հայոց կաթողիկոսութիւնը իր իշխանութիւնը վերահաստատած՝ սելուքեան սահմաններուն Հայերուն վրայ: Հերձուածը այսպէս վերջ գտած կրնայ ըլլալ»<sup>45</sup>:

Կարծում ենք, որ հակաթոռության վերացման հարցում ժամանակի առումով այդքան հեռուն գնալու կարիք չկա, մանավանդ որ սկզբնաղբյուրներում որևէ այլ հակաթոռ կաթողիկոս չի հիշատակվում Կեսարիայում կամ Սեբաստիայում, իսկ 1239 թ. հենց Սեբաստիայում գրված մի հիշատակարանում (ՄՄ 7574) նշվում է միայն Կոստանդին Բարձրբերդցու անունը՝ «ի կաթողիկոսութեան տեառն Կոստանդի Հայոց դիտապետի...»<sup>46</sup>: Ստեփանոս Օրբելյանի ժամանակագրության մեջ եղած տեղեկությունից նույնպես, ինչպես վերևում տեսանք, երևում է, որ Անանիայի մահով հակաթոռ կաթողիկոսությունը վերացել է:

Վերջում անդրադառնանք Անանիայի տապանաքարին: Հ. Բերբերյանի վերոնշյալ հոգվածի կարևոր ճշգրտումներից մեկը վերաբերում է Անանիայի՝ Սեբաստիայում Ս. Նշան եկեղեցու հյուսիսային կողմում եղած (այժմ, ամենայն հավանականությամբ, գոյություն չունի) տապանաքարին ու տապանագրին: Եթե

<sup>44</sup> Հ. Պեպելեան, նշվ. աշխ., էջ 362-363: Այս հատվածում նշված թվականը տպագրական վրիպակով տպված է 1233:

<sup>45</sup> Նույն տեղում, էջ 363:

<sup>46</sup> Հայերեն ձեռագրերի հիշատակարաններ, ԺԳ դար, էջ 208:

նրանից առաջ Անանիային անդրադարձած ուսումնասիրողները չեն կասկածել տապանաքարի արձանագրության տվյալներին, մասնավորապես այնտեղ նշված մահվան՝ 1207 թվականին, ապա նա համապատասխան աղբյուրի հղումով ցույց է տալիս, որ տապանաքարը դրվել է շատ ուշ՝ 1825 թ., և նրա արձանագրության տեքստն էլ կազմվել է այդ ժամանակ, իսկ երկու հիշատակարան՝ 1211 և 1223 թվականներից, վկայում են, որ Անանիան այդ ժամանակ դեռ ողջ էր, ուստի տապանագրի թվականը սխալ է<sup>47</sup>:

Այնուամենայնիվ, Անանիայի տապանագիրը որոշակի արժեք է ներկայացնում: Առաջին հերթին, այն ցույց է տալիս, որ Անանիա հակաթոռ կաթողիկոսն ինչ-որ ժամանակ լքել է Կեսարիայի իր նստավայրը և տեղափոխվել Սեբաստիա, որտեղ էլ կնքել է իր մահկանացուն և հուղարկավորվել: Դրանով իր հաստատումն է գտնում նաև Կիրակոս Գանձակեցու վկայությունը, ըստ որի Անանիան աթոռակալել է Սեբաստիայում (քանի որ այդ մասին ուրիշ տեղեկություն չկա):

Ութ տողանոց չափածո տապանագիրն ըստ Գարեգին Սրվանձատյանի արտագրության այսպիսին է.

«Յայս դամբարանիս եղին զմարմին,  
Տեառն Անանիա կաթողիկոսին,  
Որ օծեալ նստաւ վեհապետ ազգիս,  
Ի գերահռչակ սուրբ մենաստանիս,  
Սա էր ազգական Պետրոսի մեծին,  
Գետադարձ կոչեալ սուրբ հայրապետին,  
Ժամանեալ վախճան սուրբ կենաց նորին,  
Թուին վեց հարիւր յիսուն եւ վեցին»<sup>48</sup>:

Բուն տապանաքարի տեղադրման մասին տեղեկությունը հետևյալն է. «յաւուրս տեսուչ Յօհաննէս եպիսկոպոսի Սեբաստացւոյ շինեցաւ ի վերայ նորա (Անանիայի — Կ. Մ.) վայելուչ շիրիմ արդեամբ Քրիշթճեան Յօհաննէսի ՌՄՀԴ 1825»<sup>49</sup>: Այս առնչությամբ Հ. Բերբերյանը գրում է. «Այս յիշատակագրութենէն կը հետևի, թէ Յովհաննէս Սեբաստացիի օրով Անանիայի գերեզմանին վրայ տապանաքար չկար, և, հականաբար, ըստ աւանդութեան, գերեզման մը ցոյց կը

<sup>47</sup> Հ. Պէրպլեւեան, նշվ. աշխ., էջ 289:

<sup>48</sup> Գ. Մրուանձտեանց, *Քորոս աղբար*, հ. Ա, Կ. Պոլիս, 1879, էջ 179: Ըստ Հ. Բերբերյանի՝ տապանագրի տեքստը կազմողները Անանիայի մահվան թվականը վերցրել են Մ. Չամչյանի «Հայոց պատմության» 1786 թ. լույս տեսած երրորդ հատորից (Հ. Պէրպլեւեան, նշվ. աշխ., էջ 288-289): Սակայն նրա հղած տեղում՝ «ի նոյն ամս մեռաւ և Անանիա առանձին կաթողիկոս Սեբաստիոյ» տեղեկությունը, որի համար աղբյուր չի նշվում, դրված է 1206 թվականին վերաբերող տեղեկությունների հատվածում (Մ. Չամչեան, նշվ. աշխ., էջ 183):

<sup>49</sup> Դիւան Հայոց պատմության, գիրք Ժ, խմբ. Գիւտ Աղանեանց, Թիֆլիս, 1912, էջ 390:

տրուէր իբրև Անանիա կաթողիկոսինը, անոր մահէն շուրջ 600 տարի ետք»<sup>50</sup>:

Սակայն շատ ավելի հավանական է, որ Սեբաստիայի եկեղեցու մոտ եղել է նաև Անանիայի հին տապանաքարը, իսկ 1825 թ. պատրաստվել է միայն «վայելուչ շիրիմ», այսինքն վեցդարյա հին ու մաշված տապանաքարը փոխարինվել է նորով: Կարծում ենք, որ հին տապանաքարի վրա, ըստ այն ժամանակի սովորության, այդքան երկար արձանագրություն չպիտի լիներ, հավանաբար գրված են եղել հանգուցյալի անունն ու տիտղոսը և մահվան՝ «ի Քրիստոս» փոխադրվելու թվականը: Նոր տապանաքարի վրա ավելի ճոխ տեքստ են գրել, հավանաբար կաթողիկոսի մասին տվյալներ քաղելով Կիրակոս Գանձակեցուց և Մ. Չամչանի՝ այդ ժամանակ արդեն շրջանառության մեջ գտնվող՝ 1786 թ. հրատարակված «Հայոց պատմությունից»:

Հին տապանաքարի գոյության մասին մեր ենթադրությունն ավելի հավանական է թվում նոր տապանաքարի տարեթվի շնորհիվ, որը թեև սխալ է, բայց դրանով հանդերձ, յուրովի հուշում է նախկին գրության ճիշտ թվականի մասին: Բանն այն է, որ երբ զուգադրում ենք Անանիայի մահվան իրական՝ 1227 և նոր տապանաքարի 1207 թվականները՝ համապատասխանաբար Հայոց ՈՀԶ (676+ 551= 1227) և ՈՄԶ (656+ 551= 1207), տեսնում ենք, որ հարյուրավորի և միավորի թվատառերը նույնն են, և միայն տասնավորի թվատառն է տարբեր: Կարելի է ենթադրել, որ Անանիայի հին տապանաքարին թվատառերով նշված է եղել ճիշտ թվականը՝ Հայոց ՈՀԶ (1227), սակայն մեջտեղի (տասնավորի) թվատառը եղծված է եղել կամ սխալ է վերծանվել (հասկացել են Հայոց ՈՄԶ), որի հետևանքով նոր տապանաքարի վրա գրել են 1207: Հնարավոր է, որ քարի այդ մասում կոտրվածք է եղել և երևացել է միայն տասնավորն արտահայտող «Հ» (70) թվատառի վերին մասնիկը, որից ելնելով այն որպես «Մ» (50) են վերծանել<sup>51</sup>: Թերևս հին տապանաքարի վնասված լինելն է նաև պատճառ դարձել, որպեսզի 1825-ին պատրաստվի նոր՝ «վայելուչ» տապանաքար:

Ամփոփելով կարող ենք ասել, որ Կիրակոս Գանձակեցու պատմության, Անանուն եղեսպառ ժամանակագրության, Թեոդորոս Կեսարացու վկայաբանության, հայերեն ձեռագրերի չորս հիշատակարանների, Ստեփանոս Օրբելյանի ժամանակագրության մեջ պահպանված տեղեկությունները, վկայում են, որ 1201-1227 թթ. Ռուսի սուլթանությունում՝ նախ Կեսարիայում, ապա որոշ ժամանակ անց Սեբաստիայում, գործել է հակաթուղ կաթողիկոսություն հայտ մականունով Անանիայի գլխավորությունը: Վերջինս հավանաբար սերում էր ԺԱ

<sup>50</sup> Հ. Պեպելեան, նշվ. աշխ., էջ 289:

<sup>51</sup> Նշենք, որ վիմագրության մեջ «Հ» տառի գոյության մի ձև կա, որը շատ նման է «Մ»-ի: Այդպիսին են, օրինակ, Կեչառիսի վանքում ԺԳ դարի մի տապանաքարի արձանագրության և Արարատի մարզի Ս. Կարապետ վանքի եկեղեցու ներսում եղած ԺԴ դարի սկզբների երկու վիմագրերում օգտագործված համապատասխան տառերը:



դարի կաթողիկոս Պետրոս Գետադարձի տոհմից և հավակնում էր Հայոց կաթողիկոսական աթոռին, սակայն Կիլիկիայում իր նպատակին հասնելու հնարավորություն չտեսնելով, հակաթոռ կաթողիկոսություն է ստեղծել Ռումի սուլթանության տարածքում՝ Ռուֆն աղ-Դին Սուլեյմանշահ Բ-ի համաձայնությամբ (1201 թ.): Նա վայելել է տեղի իշխանությունների բարեհաճությունը, քանի որ հակաթոռ կաթողիկոսության գոյությունն այդ տարածքի հայությանը հոգևոր-եկեղեցական առումով կտրում էր Հռոմիլայի կաթողիկոսությունից և Կիլիկիայի Հայոց թագավորությունից: Այդ պատճառով նախ Հովհաննես Սսեցի կաթողիկոսն ու Լևոն թագավորը, ապա Կոստանդին Բարձրբերդցի կաթողիկոսը փորձել են հնազանդության բերել հակաթոռ կաթողիկոսին, սակայն արդյունքի չեն հասել: 1227 թ. Անանիայի մահով հակաթոռ կաթողիկոսությունը վերացել է:

KAREN MATEVOSYAN

#### ANTICATHOLICOS ANANIA OF THE SULTANATE OF RUM

**Key words:** Catholicos, Anania, Cilicia, colophon, sultan, Caesarea, Hromkla.

The information given in the history of Kirakos Gandzakets'i, in the Chronicles of the Anonymous of Edessa and Step'anos Orbelean, in four colophons of Armenian manuscripts and in other sources witness that in 1201–1227, in the Sultanate of Rum, in Kayseri, and after some time in Sebastia (Sivas), there was a catholicosate (patriarchate) under the leadership of Anania, nicknamed Khayt. He probably descended from the family of the 11<sup>th</sup> century Catholicos Petros Getadardz and claimed to be the Catholicos of all Armenians. Not having achieved his goal in Cilicia, in 1201 he created a catholicosate on the territory of the Sultanate of Rum by the consent of Sultan Rukn ad-Din Suleimanshah II. Anania enjoyed the favor of the local authorities, since the existence of this catholicosate separated in spiritual and ecclesiastical terms the Armenians living in the territory of the sultanate from the Catholicosate of All Armenians located in Hromkla and from the Armenian Kingdom of Cilicia.

The article clarifies some facts of Anania's life and work. It is demonstrated that the Catholicos of All Armenians Yovhannēs Ssets'i (1203–1221), King Levon I (1198–1219), and later also Catholicos Constantine (1221–1267) tried to achieve the obedience of the anti-Catholicos, but without result, and that in 1227 with the death of Anania the catholicosate founded by him in the Sultanate of Rum ceased to exist. A study of the text of the *Martyrdom of Theodore Kesarats'i* revealed that it was

written in 1204 in Kayseri, at the behest of Anania. Among other issues, the question of the date of Anania's death in the inscription on his tombstone is also discussed in the article.

**КАРЕН МАТЕВОСЯН**

### **АНТИКАТОЛИКОС РУМСКОГО СУЛТАНАТА АНАНИЯ**

**Ключевые слова:** Католикос, Анания, Киликия, памятная запись, султан, Кесария, Ромкла.

Сведения, сохранившиеся в истории Киракоса Гандзакеци, в летописях Анонима Эдесского и Степаноса Орбеляна, в четырех памятных записях армянских рукописей и в других источниках показывают, что в 1201-1227 гг. в Румском (Иконийском) султанате, в Кесарии (Кайсери), а через некоторое время в Себастии (Сивас), существовал католикосат (патриарший престол) под предводительством Анании по прозвищу Хайт. Он вероятно происходил из рода католикоса XI века Петроса Гетадарца и претендовал на место католикоса всех армян, но не достигнув своей цели в Киликии, в 1201 г. создал католикосат на территории Румского султаната с согласия султана Рукн ад-Дина Сулейманшаха II. Анания пользовался благосклонностью местных властей, так как существование этого католикосата в духовном и церковном отношении отделяло армян, живущих на территории султаната, от находящегося в Ромкле католикосата всех армян и от Киликийского Армянского царства.

В статье уточнены некоторые факты жизни и деятельности Анании. Показано, что католикос всех армян Ованес Ссеци (1203-1221) и царь Левон I (1198-1219), а в последствии также католикос Константин (1221-1267) пытались добиться покорности антикатоликоса, но результатов не добились, и что 1227 г. со смертью Анании основанный им католикосат в Румском султанате перестал существовать. На основании изучения текста “мученичества Феодора Кесарийского” предполагается, что оно было написано в 1204 г. в Кесарии, по велению Анании. Рассматривается вопрос о дате смерти Анании в надписи на его надгробном камне, и т. д.